

Skal sjekke forureining ved 80 verksemder

Publisert 01.03.2017

Fylkesmannen i Hordaland skal gjennomføre om lag 80 tilsyn med forureining i 2017. Viktige tema vil vere prioriterte miljøgifter, handtering av farleg avfall og kjemikal, utslepp, forureining og internkontroll. I år, som i fjor, vil levering av avfall og farleg avfall vere tema på alle tilsyn.



Fylkesmannen skal delta i landsdekkjande tilsynsaksjonar med akvakultur i 2017

(Foto: Fylkesmannen i Hordaland)

Risikobasert tilsyn

Tilsyna skal vere risikobaserte og vi skal fokusere på dei viktigaste miljøutfordringane. Det innebør mellom anna at vi skal kontrollere der det er mest truleg at det er alvorlege brot på regelverket, og der dette har størst verknad på miljøet. Vi skal reagere raskt på alvorlege brot og følgje opp tips om ulovlege miljøskadelege tilhøve.

Oversikt over kva miljøgifter som forureiningstilsynet skal prioritera finn ein på miljostatus.no om kjemikal - [prioritetslista](#).

Planlagte tilsyn

Følgjande aksjonar skal gjennomførast i 2017:

- Avfallsplanar i hamner
- Mellombels anleggsverksemd inkludert massetippar og nyttig bruk av avfall
- Akvakultur (matfisk og settefisk)
- Asfaltverk
- Fiskeforedling

Dei fire første aksjonane er landsdekkjande og vert gjennomført i samarbeid med Miljødirektoratet. Tilsyn med fiskeforedlingsverksemdene er ein lokal aksjon i Hordaland. I tillegg skal vi gjennomføre om lag 35 tilsyn med

verksemder med løyve etter forureiningslova og forskriftregulerte verksemder.

Vi skal òg gjennomføre 3 forvaltningstilsyn med korleis kommunane utøver sin myndigheit om forsøpling.

Vi vil informere meir om kvar aksjon når tida for aksjonen nærmar seg.

Gebyr

Fylkesmannen tar gebyr til statskassa for kontrollar etter forureiningslova i tråd med [forureiningsforskrifta kapittel 39](#). Dette er i tråd med prinsippet om at forureinar skal betale.